

Städten und Unterthanen insbesondere wegen der Elbschiffahrt und der Niederlage zu Pirna bis auf Widerruf festgesetzt haben, unverbrüchlich zu halten.

Orig. im Rathsarchiv zu Pirna mit dem beschädigten Dresdner Stadtsiegel an einem Pergamentstreifen.

Die Urk. stimmt in den einzelnen Vertragspunkten mit der oben S. 91 mitgetheilten von Pirna für Dresden ausgestellten wörtlich überein.

No. 58. 1392. 14. Nov.

König Wenzel verleiht der Stadt Pirna den Matthäusmarkt.

Wir Wenczlaw von gotes gnaden Romischer kunig zu allen czeiten merer des reichs vnd kunig zu Beheim bekennen —, das wir durch nucze vnd besserung willen vnser stat czu Pirne den burgern vnd ynwonern doselbst eynen newen iarmarkt, der anheben sol an sand Matheus tage des heiligen ewangelisten vnd weren czwen gancze tage dornach, nu furbas mer ewiclichen alle iare vf dieselbe zeite gnedlichen gegeben haben vnd geben yn den in kraft dicz briefs vnd kuniclicher macht zu Beheim zu haben, des zu gebrauchen vnd zu geniessen in aller der masse, als das an andern iarmerkten in andern steten dorumb gelegen gewonlichen ist, vnschedlichen doch andern steten, die dorumb in der nehen gelegen sind an iren iarmerkten, ob sie dheine vf dieselbe czeite hetten. Ouch so haben wir denselben vnsern burgern zu Pirne vnd allen den, die denselben iarmarkte bawen vnd vf den komen vnd czihen werden, diese besondere genade getan, das sie mit aller irer kaufmanschaft vnd habe czolfrey vnd an alles hindernusse in dieselb vnser stat zu Pirne vnd wider doraus czihen vnd varen mogen bynnen der czeite als derselbe iarmarkt weret drey iare, die sich von datum dicz briefs nocheinander vorlauffen, vnd wann dieselben drey iare vsgangen sind, so sal ydermeniclich czollen als gewonlichen ist. Vnd gebieten dorumb allen fursten geistlichen vnd werntlichen grauen freyen rittern knechten vogten pflegern burggrafen amptluten vnd gemeinschefften der stete, vnd mit namen vnserm czollner zu Pirne¹⁾ der ist oder in czeiten wirdet, vnd ouch sust allen andern vnsern vndertanen vnd getrewen ernstlichen vnd vesticlichen mit diesem brief, das sie die egenanten vnserer burger vnd stat zu Pirne an demselben iarmarkte vnd gnaden noch ouch die kauflute vnd andere lute, die czu vnd von demselben iarmarkte czihen vnd den bawen werden, nicht hindern noch irren, sunder sie des gebrauchen vnd geniessen lassen vnd ouch do bey hanthaben schutzen vnd schirmen sullen, als sie vnserer swere vngenade vermeiden wollen. Mit vrkunt dicz briefs vorsigelt mit vnser kuniclicher maiestat insigel. Geben zu Betlern noch Crists geburt dreyzenhundert iar dornach in dem czwey vnd newnczigstem iare des nehsten donerstags noch sand Merteins tage vnser reiche des Behmischen in dem dreissigsten vnd des Romischen in dem siben czehenden iaren.

Ad relationem S. subcamerarii
Wlachnico de Weytmule.

R. Wenczeslaus de Olomucz.

Nach dem Orig. im Rathsarchiv zu Pirna mit dem zerbrochenen grossen Majestätssiegel des Königs (mit Rücksiegel) an einem Pergamentstreifen.

1) Orig. zu Pirne czu Pirne.